

DOMINGO 1 DO ADVENTO Ciclo B

PRIMEIRA Is 63, 16b-17. 19b; 64, 2b-7:

¡Ai, se racháse-lo ceo (e) baixases!

PROCLAMACIÓN DA PALABRA RECOLLIDA NA PROFECÍA DE ISAÍAS

Ti, Señor, es o noso pai,
o "noso Redentor desde sempre" é o teu Nome.
Por que, Señor, nos deixaches descarriar lonxe dos teus vieiros,
e fíxeches endurecer o noso corazón apartándose do teu respecto?
¡Cambia de actitude por amor dos teus servos,
por amor das tribos da túa herdanza!
¡Ai, se rachases o ceo e baixases! ¡Coa túa presenza rebulirían os montes.
Baixaches, e coa túa presenza tremeron os montes:
unha cousa que desde antigo nunca se oíra, pero certo que se nos fixo escoitar:
O ollo non viu fóra de ti ningún deus, que tal lle faga a quen espera nel.
Atopácheste co que se alegraba e practicara a xustiza,
cos que se lembraban de ti nos teus vieiros.
Velaí: estabas enfadado porque pecamos,
pero estaremos sempre nos teus vieiros e salvarémonos.
Todos nós fomos coma un impuro,
e toda a nosa xustiza como a roupa da menstruante.
Todos nós murchamos coma a folla,
e as nosas iniquidades leváronnos coma o vento.
Non había quen invocase o teu nome,
quen espertase para acollerse a ti,
porque ti escondíchesnos a túa cara,
e alagáchesnos co lote das nosas culpas.
Pero agora, Señor, ti es o noso Pai.
Nós somos o barro e ti es o oleiro,
pois obra das túas mans somos todos nós.

SAL. RESP. Sal 79, 2ac e 3b. 15-16. 18-19

R/ (4): *Deus, convértenos, ilumina sobre nós o teu rostro e salvarémonos*

Escoita, pastor de Israel,
ti que sentas sobre os querubíns,
esperta o teu poder e ven salvarnos.

Dá a volta, Deus dos exércitos,
olla desde o ceo e ve.
Atende esta vide,
este sarmento que plantaches coa túa man,
o bacelo que ti fortaleciches.

Que a túa man protexa ao teu elixido,
o home que ti fortaleciches.
Non nos afastaremos máis de ti;
danos vida de novo, e invocaremos o teu nome.

SEGUNDA 1 Cor 1, 3-9:
Esperamos a manifestación do noso Señor Xesús Cristo

**PROCLAMACIÓN DA PALABRA RECOLLIDA
NA PRIMEIRA CARTA DE SAN PAULO APÓSTOLO ÓS CORINTIOS**

Irmáns e irmás:

Desexámosvos graza e paz de parte de Deus, noso Pai, e do Señor Cristo.

Non paro de lle dar grazas a Deus por vós, pola graza de Deus que se vos deu por medio de Cristo Xesús. Porque por medio del quedastes ricos en todo, nos dons da palabra e do coñecemento: e así confirmouse solidamente entre vós o testemuño en favor de Cristo. De xeito que non carecedes de ningún don, mentres agardades a revelación do Noso Señor Xesús Cristo. El é quen vos manterá firmes deica á fin, para que ninguén vos poida acusar de nada no día do Noso Señor Xesús Cristo. Deus é fiel e foi El quen vos chamou á comunidade do seu Fillo Xesús Cristo, noso Señor.

ALELUIA Coma no núm. 1

DOMINGO 1 DO ADVENTO Ciclo B

EVANXEO. Mc 13, 33-37:
Estade á espreita: non sabedes cando vai chegar o señor da casa

PROCLAMACIÓN DO SANTO EVANXEO SEGUNDO MARCOS

Daquela dilles Xesús aos seus discípulos:

Estade á espreita e atentos, que non sabedes cando será o momento.

É coma un home que foi ao estranxeiro, deixando a casa e maila facenda nas mans dos seus criados, encargándolles a cada un o que tiña que facer; e ao porteiro ordenoulle que velase.

Vixiade vós, polo tanto, pois non sabedes cando chegará o amo da casa: se á tardiña ou con noite cerrada, se co canto do galo ou no amencer. Non vaia ser que chegue de repente, e vos atope durmindo. E o que vos digo e vós, tamén llelo digo a todos: ¡Estade en vela!